

unterste lebendig machen / die Staubhauffen vnd verband sind: Aber Tobia der Ammoniter neben jm sprach / Las sie nur bawen wenn Füchse hin auff zögen / die den Baw zu hinders dem etc.

Nehemia Gebet.

Höre vnser Gott / wie veracht sind wir / Kere ire schmach auff iren Kopff / Das du sie gebest in verachtung im Lande ires gefengnis. Decke ire misse that nicht zu / vnd ire sünde vertilge nicht für dir / Denn sie haben die Bawleute gereizet. Aber wir baweten die mauren / vnd fügeten sie ganz an einander / bis an die halbe höhe / Vnd das Volck gewan ein hertz zu erbeiten.

Da aber Saneballat / vnd Tobia / vnd die Araber / vnd Ammoniter / vnd Asdoditer höreren / das die mauren zu Jerusalem zugemacht waren / vnd das sie die lücken angefangen hatten zu büssen / wurden sie seer zornig. Vnd machten alle sampt einen Bund zu hauffen / das sie kemen vnd stritten wider Jerusalem / vnd machten drin einen irthum. Wir aber beten zu vnserm Gott / vnd stelleten Schutz vber sie tag vnd nacht gegen sie. Vnd Juda sprach / Die krafft der Treger ist zu schwach / vnd des staubs ist zu viel / wir künden an der mauren nicht bawen. Vnser Widersacher aber gedachten / sie sollens nicht wissen noch sehen / bis wir mitten vnter sie komen / vnd sie erwürgen / vnd das Werck hindern.

Da aber die Jüden / die neben jnen woneten / kamen vnd sageten vns wol zehen mal / aus allen örten da sie vmb vns woneten / Da stellet ich vnten an die örter hinder der mauren in die graben / das volck nach iren Geschlechtern / mit iren Schwerten / Spies vnd Bogen. Vnd besahe es / vnd macht mich auff / vnd sprach zu den Ratherrn vnd Obersten / vnd dem andern Volck / Fürchtet euch nicht für jnen / Gedencet an den grossen schrecklichen HERRN / vnd streitet für ewre Brüder / Söhne / Töchter / Weiber vnd Heuser.

Da aber vnser Feinde höreren / das vns war kund worden / machte Gott iren Rat zu nicht. Vnd wir kereten alle wider zur mauren / ein jglicher zu seiner arbeit. Vnd es geschach hin fürder / das die Jünglinge die helfft theten die arbeit / die ander helfft hielten Spiesse / Schilde / Bogen / vnd Panzer. Vnd die Obersten stunden hinder dem ganzen hause Juda / die da baweten an der mauren / vnd trugen last / von denen die jnen auff luden / Mit einer hand theten sie die arbeit / vnd mit der andern hielten sie die woffen. Vnd ein jglicher der da bawet



hatte